



Broj: 02-05-23464-1/15  
Sarajevo, 31.08.2015. godine

## **Zastupnicima Skupštine Kantona Sarajevo**

**PREDMET:** Stavovi na amandmane zastupnika u Skupštini Kantona Sarajevo po materijalima koji se nalaze na dnevnom redu 6. Radne sjednice Skupštine Kantona Sarajevo

Na **16.** sjednici Vlade Kantona Sarajevo održanoj **31.08.2015.** godine, a u funkciji pripreme 6. Radne sjednice Skupštine Kantona Sarajevo, razmatrani su amandmani poslanika u Skupštini Kantona Sarajevo po materijalima koji se nalaze na dnevnom redu navedene sjednice, i to:

1. Amandmani Segmedine Srna-Bajramović zastupnica SDP BIH u Skupštini Kantona Sarajevo.,
2. Amandmani Kluba zastupnika "Naša stranke".

Nakon razmatranja amandmana zastupnika u Skupštini Kantona Sarajevo, Vlada Kantona Sarajevo zauzela je sljedeće

## **STAVOVE**

### **1. SEGMEDINA SRNA-BAJRAMOVIĆ ZASTUPNICA SDP BIH U SKUPŠTINI KANTONA SARAJEVO**

**1.1. Na Prijedlog izmjena i dopuna Budžeta Kantona Sarajevo za 2015. godinu, podnosi sljedeće:**

#### **AMANDMAN I**

U okviru potrošačke jedinice 0001 Dom za socijalno zdravstveno zbrinjavanje osoba sa invaliditetom i drugih osoba izvršiti:

- uvećanje pozicije ekonomski kod 611100 – Bruto plaće i naknade sa 1.379.400,00 KM (iz budžetskih sredstava 1.263.300,00 KM i iz vlastitih prihoda 116.100,00 KM) na iznos 1.435.084,00 KM (iz budžetskih sredstava 1.319.000,00 KM i iz vlastitih prihoda 116.084,00 KM).
- uvećanje pozicije ekonomski kod 612100- doprinosi poslodavca sa 145.000,00 KM (iz budžetskih sredstava 132.600,00 KM, iz vlastitih prihoda 12.400,00 KM) na iznos 155.000,00 KM (iz budžetskih sredstava 142.600,00 KM, iz vlastitih prihoda 12.400,00 KM).

**Razliku sredstava od 65.684,00 KM osigurati umanjenjem na potrošačkoj jedinici 0001 Kabinet Premijera na poziciji ekonomski kod 614200 funkcija 011 Transferi neprofitnim organizacijama koja je planirana u iznosu od 70.000,00 KM.**

#### **Obrazloženje:**

Kako je prvobitno usvojenim budžetom za 2015.godinu odobren veći broj zaposlenih (91) u odnosu na prvobitni zahtjev Ustanove (87), te kako se, u ustanovama socijalne zaštite od avgusta 2014.godine, shodno sporazumu o postupku utvrđivanja platnih razreda i koeficijenata za obračun plata i naknada koje nemaju karatker plate u javnim ustanovama socijalne zaštite Kantona Sarajevo

između Samostalnog sindikata državnih službenika i namještenika u organima državne službe, sudskoj vlasti i javnim ustanovama u Federaciji BiH i Ministarstva za rad, socijalnu politiku, raseljena lica i izbjeglice KS, a kasnije i shodno usvojenom zakonu primjenjuju novi, veći koeficijenti za obračun plata, što u odnosu na izvršenje u 2014.godini, implicira potrebu za većim sredstvima po ovom osnovu i za prvih sedam mjeseci 2015.godine.

Imajući u vidu navedene razloge, ovim zahtjevom za dodjelu sredstava u postupku izmjena i dopuna budžeta KS za 2015.godinu, za 611100- bruto plaće i naknade potrebno je ukupno 1.435.084,00 KM (iz budžetskih sredstava 1.319.000,00 KM i iz vlastitih prihoda 116.084,00 KM). Iznos učešće po osnovu vlastitih sredstava na ovoj poziciji projiciran je shodno ugovoru o osiguranju zdravstvene zaštite korisnicima Doma za socijalno zdravstveno zbrinjavanje osoba sa invaliditetom i drugih osoba sa Zavodom zdravstvenog osiguranja KS, po osnovu kojeg Ustanova prima namjenska sredstva.

**Stav predlagača:** Amandman se ne prihvata.

### **O b r a z l o ž e n j e**

Izvršenje bruto plaća za Dom za socijalno zdravstveno zbrinjavanje osoba sa invaliditetom i drugih osoba za sedam mjeseci 2015. godine je 779.651 KM. Mjesečna plata koja iznosi 111.728 KM pomnožena sa 12 mjeseci iznosi 1.336.000 KM, tako da će biti dovoljno sredstava za isplatu bruto plaća.

#### **AMANDMAN II**

U okviru potrošačke jedinice 0005 Sarajevski ratni teatar izvršiti uvećanje pozicije ekonomski kod 613200 – Izdaci za energiju sa 17.900, 00 KM na 34.000,00 KM.

**Razliku sredstava od 16.100,00 KM osigurati umanjenjem na potrošačkoj jedinici 0001 Kabinet predsjedavajućeg i zamjenici predsjedavajućeg Skupštine KS na poziciji ekonomski kod 614200 funkcija 011 Transferi pojedincima koja je planirana u iznosu od 20.000,00 KM.**

#### **Obrazloženje:**

U okviru Budžeta za 2015, godinu, za Sarajevski ratni teatar na poziciji 613200 -Izdaci za energiju, planirano je 17,900,00 KM za troškove energije. Sa ove pozicije vrše se uplate za troškove prirodnog gasa i električne energije. Kako je vidljivo u izvještaju o javnoj raspravi Ministarstvo finansija je do sada više puta na teret SARTR-a izvršilo avansne uplate (ekonomski kod 131112) za troškove prirodnog gasa, a na osnovu procjena dostavljenih od strane Sarajevogasa.

Prijedlogom izmjena Budžeta za 2015, godinu, sredstva na poziciji 613200 - izdaci za energiju u iznosu od 17,900,00 KM nisu dovoljna kako bi se zatvorile avansne uplate koje u ovom momentu iznose ukupno 18,911,71 KM. Kako bi bili u mogućnosti izvršiti zakonsko pravdanje avansa, potrebno je da se pozicija 613200- Izdaci za energiju uveća sa 17,900,00 KM na 34.000,00 KM, uz napomenu da troškovi električne energije iznose cca 15.000,00 KM godišnje.

**Stav predlagača:** Amandman se ne prihvata

### **O b r a z l o ž e n j e**

U 2014. godini kod JU SARTR avans za plin iznosio je 14.195,77 KM od kojih je 7.537,45 KM izdata faktura. Ostatak od 6.658,32 KM je prenesen u 2015. godinu. U 2015. godini avans za plin iznosi 12.253,37 KM i sa ostatkom od prethodne godine avans iznosi 18.911,71 KM.

Do sada nije bilo podnijetih faktura. Na poziciji 613200 planiran je iznos od 17.900 i do sada je utrošeno 8.058 KM i do kraja 2015. godine se očekuje utrošak od cca 7.000 KM što je ukupno 15.058 KM. Ova sredstva su isključivo troše za električnu energiju. Ako bi se tokom 2015. godine izdale fakture kao i prethodne godine (cca 8.000 KM), onda bi ukupnan iznos na poziciji 613200

iznosio 23.000 KM, što je za 5.100 KM manje od trenutno planiranog budžeta na ovoj poziciji. Obzirom da je amandmanom traženo dodatnih 16.100 KM, a procjena je da će nedostajati 5.100 KM, tokom izvršavanja Budžeta, krajem godine, preraspodjelom sredstava obezbijedit će se nedostajuća sredstva i to kada bude poznat tačan iznos nedostajućih sredstava.

## **2. AMANDMANI KLUBA ZASTUPNIKA “NAŠA STRANKE”**

**2.1. Na Prijedlog izmjena i dopuna Budžeta Kantona Sarajevo za 2015. godinu,** podnosi sljedeće:

### **AMANDMAN I**

Ministarstvo zdravstva, pozicija 614300 KAN011 074 Sprovođenje programa obavezne preventivne sistematske deratizacije u Kantonu Sarajevo 120.000 KM povećava se za 880.000 KM.

Ministarstvo saobraćaja, pozicija 614400 EAO004 107 Pokrivanje razlike do ekonomske cijene za penzionerske mjesečne pretpl. karte KJKP „Gras“ 5.000.000 KM smanjuje se za 430.000 KM.

Ministarstvo saobraćaja, pozicija 614400 EAO007 107 Subvencionisanje troškova studentskih karata 1.450.000 KM smanjuje se za 450.000 KM.

**Obrazloženje:** Kanton Sarajevo je u posljednje dvije godine stekao problem sa glodarima, žoharima i komarcima. Na to upućuje stručna javnost i inspekcijski organi koji djeluju po pozivima građana. Kao osnovni uzrok alarmantne situacije, u kojoj se pune dvije godine ne vrši stručna, sistematska i sigurna preventivna deratizacija i dezinfekcija, vidimo izmjenu u načinu tretiranja površina godišnjom Odlukom o provođenju obavezne preventivne deratizacije. Odlukom su se odjednom prestale tretirati sve površine Kantona, te se tretiraju samo javne površine i javna dobra, koje čine samo frakciju ukupne površine Kantona. U skladu sa ovom izmjenom drastično su smanjena

budžetska sredstva za ovu namjenu. Ova praksa je počela 2013. godine Odlukom objavljenom u Službenim novinama Kantona Sarajevo br. 22/13.

Istovremeno, napuštena je praksa da deratizaciju i dezinfekciju vrši jedan izvođač ili mala grupa izvođača izabranih strogo kontrolisanim javnim pozivom. Sada imamo situaciju da ne znamo koje firme djeluju i na kojim područjima. Imamo situaciju da neke od firmi od pravnih lica insistiraju na gotovinskom plaćanju bez izdavanja faktura uz sramotno nedostatnu dokumentaciju i bez prisustva stručnog i upravnog nadzora.

Imajući u vidu bitnost sistemske i redovne deratizacije i dezinfekcije za zdravlje građana, te u nadi da još imamo vremena spriječiti širenje zaraznih bolesti zbog velikog porasta glodara i komaraca, bitno je da se već do kraja ove godine sanira počinjena šteta, te iznos koji bi možda bio dostatan za cijelu godinu utroši do kraja ove godine kroz jesenju obradu svih površina u Kantonu. Ovom prilikom napominjemo da ćemo pokrenuti izmjenu Odluke kojom će se vratiti praksa ustanovljena prije više od 50 godina da se redovno tretiraju sve površine od strane jednog dobavljača, a ne samo frakcija površine. Potrebno je i ukinuti praksu povjeravanja ovog osjetljivog posla velikom broju nekoordiniranih dobavljača koji rade po različitim metodologijama koristeći otrove neuravnoteženog kvaliteta.

Za rješenje situacije koja prijeti da postane daleko opasnija po građane od problema pasa lualica odabrali smo smanjenje transfera prema preduzeću „Gras“ i to sa pozicija subvencija karata penzionerima i studentima. Očekujemo od preduzeća „Gras“ da dio pozicije subvencija za

penzionere nadoknadi kroz unutrašnje rezerve, tačnije, dugo očekivanom reorganizacijom firme. Iznos umanjen sa pozicije subvencije za studente opravdava projekcija za ostatak 2015. godine, kao i ostvarene vožnje u prvom dijelu godine, te ne očekujemo da će po ovom osnovu „Gras“ trebati više od iznosa preostalog nakon usvajanja ovog amandmana.

Ne trebamo posebno napominjati da Naša stranka kao jedno od rješenja katastrofalne usluge javnog prijevoza građana vidi u na stečaju preduzeća „Gras“ iz kojeg bi izdvojili njegove zdrave dijelove, prevashodno tramvajski i trolejbuski saobraćaj, te preporučili firmu bez koje je Sarajevo teško i zamisliti.

**Stav predlagača:** Amandman se ne prihvata.

### **O b r a z l o ž e n j e**

Sredstva planirana za provođenje obavezne preventivne sistematske deratizacije na području Kantona Sarajevo, u Budžetu Kantona Sarajevo za 2015. godinu u iznosu od 120.000 KM koja su za ovu godinu dovoljna i koja bi trebala osigurati kvalitetnu i efikasnu deratizaciju uz adekvatan nadzor i kontrolu izvođenja deratizacije, a u cilju sprječavanja i suzbijanja zaraznih bolesti, poboljšanja općih higijenskih uslova za život, zaštite čovjekove sredine i smanjenja ekonomskih šteta koje prouzrokuju štetni glodari. Povećanje od 880.000 KM bi značilo da se 1/3 ukupnih sredstava Ministarstva zdravstva troše za ove namjene, a da se pri tome ne vodi računa o članu 8. Odluke prema kojem svi vlasnici ili korisnici ili upravitelji objekata ili prostora, mogu i sami izabrati izvođača deratizacije ili odabrati onoga koga je na osnovu javnog tendera izabrao Kanton Sarajevo. Obavezna preventivna sistematska deratizacija se finansira iz Budžeta Kantona Sarajevo i njome su obuhvaćene javne površine i javna dobra koja su definisana u članu 2. Odluke o obaveznoj preventivnoj sistematskoj deratizaciji na području Kantona Sarajevo („Službene novine Kantona Sarajevo“, broj 22/13), i za koju Kanton Sarajevo raspisuje javni tender i bira najpovoljnijeg izvođača, u skladu sa Zakonom o javnim nabavkama Bosne i Hercegovine. Samim tim nije napuštena praksa da deratizaciju i dezinfekciju vrši jedan izvođač ili mala grupa izvođača. Problem ekskluziviteta pri izboru ponuđača i duga procedura pri Agenciji za žalbe BiH ne znače da se sredstva za ove namjene trebaju uvećati.

Sredstva predviđena za subvencionirani prevoz kategorija korisnika penzionera i studenata koja su planirana u Budžetu Kantona Sarajevo za 2015. godinu su planirana u minimalno prihvatljivom iznosu koji najvjerovatnije neće biti dovoljan za izmirivanje svih obaveza za subvencionirani prevoz korisnika do kraja godine. Pozicija je umanjena sa 6.500.000,00 KM na iznos od 5.000.000,00 KM. Sredstva su planirana u iznosu manjem od redovnih obaveza za ove kategorije korisnika jer Ministarstvo saobraćaja kontinuirano provodi reviziju kupona svih korisnika.

Sredstva na poziciji subvencioniranje troškova studentskih karata ne podrazumjevaju samo subvencioniranje prevoznika KJKP „GRAS“ d.o.o. Sarajevo već i prevoznika Centrotans d.o.o. Sarajevo. Sredstva za kategoriju korisnika subvencioniranje troškova studentskih karata su planirana u manjem iznosu nego što je potreban do kraja godine pod pretpostavkom efekata provedene revizije za ovu kategoriju korisnika.

Ministarstvo saobraćaja je u toku 2015. godine provelo niz kontinuiranih mjera kojima se postigla značajna ušteda iz budžeta za kategorije subvencioniranih korisnika javnog prevoza. Sredstva su preraspoređena u unapređenje usluga javnog prevoza putnika i povećanje efikasnosti u poslovanju KJKP GRAS d.o.o. Sarajevo.

Plaćanje karata za subvencionirane kategorije korisnika ni na koji način nije povezano sa reorganizacijom firme KJKP GRAS d.o.o. Sarajevo, jer u ovome slučaju Kanton Sarajevo plaća javni prevoz za određene kategorije korisnika a ne daje direktnu subvenciju poslovanju KJKP

GRAS d.o.o. Sarajevo. Smanjenjem subvencija bi se samo smanjila prava korisnika subvencioniranog odnosno kategorija penzionera i studenata.

Ministarstvo saobraćaja je odobrilo Program konsolidacije poslovanja preduzeća KJKP GRAS d.o.o. Sarajevo na koji je Vlada Kantona Sarajevo dala saglasnost kojim su predviđene mjere reorganizacije poslovanja KJKP „GRAS“ d.o.o. Sarajevo.

Mjere reorganizacije poslovanja između ostalog predviđaju smanjenje broja uposlenih kroz program zbrinjavanja, umanjeње plata uposlenima, mjere koje trebaju dovesti do povećanja prihoda iz poslovanja, te ostale mjere koje trebaju povećati efikasnost i produktivnost u poslovanju ovog komunalnog preduzeća. Najveći problem preduzeća predstavljaju obaveze za poreze i doprinose iz prethodnih perioda koje KJKP GRAS d.o.o. Sarajevo nije izmirivao.

## **AMANDMAN II**

Ministarstvo za obrazovanje, nauku i mlade, iza pozicije 614200 LAM001 096 Stipendije učenicima i studentima 100.000 KM dodaje se nova pozicija Stipendije studentima Odsjeka za računarstvo i informatiku Elektrotehničkog fakulteta Univerziteta u Sarajevu 450.000 KM.

Ministarstvo komunalne privrede i infrastrukture, pozicija 614400 WAO003 051 KJKP „Rad“ Sarajevo, Komunalni redari, 628.700 KM smanjuje se za 314.350 KM.

Ministarstvo finansija, pozicija 614300 JAN001 041 „SERDA“ 400.000 KM smanjuje se za 135.500 KM.

**Obrazloženje:** Vlada Kantona Sarajevo je upoznata sa činjenicom da je u zadnjih nekoliko godina jedan od najvećih generatora radnih mjesta sektor informacijskih tehnologija. Sve je veći broj firmi koje zapošljavaju isključivo inženjere informatičare, takozvane programere i da je ova struka deficitarna na tržištu rada. Vlada je to prepoznala, pa je premijer Elmedin Konaković u svom ekspozeu najavio poticaje ovom sektoru. Mi se potpuno slažemo sa stavom Vlade, ali nismo primijetili da se taj stav oslikava u Budžetu. Najmanje što Vlada može učiniti je privući veći broj studenata u ovaj sektor tako što će ukinuti kategoriju samofinansirajućih studenata. Ovaj amandman predviđa pokrivanje troškova studija svim redovnim studentima Odsjeka za računarstvo i informatiku Elektrotehničkog fakulteta Univerziteta u Sarajevu. Iznos je zasnovan na broju od 250 studenata.

Transfer prema KJKP „Rad“ po osnovu komunalnih redara se polovi kako bi se firma stimulisala da boljim radom, izdavanjem i naplatom kazni, te boljom unutrašnjom organizacijom firme ova pozicija nadomjesti do potrebnog iznosa.

Transfer Sarajevskoj razvojnoj agenciji se umanjuje kako bi se potaknula u putu ka samoodrživosti i kako bi se okrenula evropskim i regionalnim fondovima kao osnovnim izvorima svog finansiranja. Ova agencija je u partnerstvu sa 32 opštine i Kanton Sarajevo snosi nesrazmjerno učešće u radu agencije.

**Stav predlagača:** Amandman se ne prihvata.

## **O b r a z l o ž e n j e**

Sredstva na poziciji KJKP „RAD“ su planirana za isplatu plaća KJKP "RAD" d.o.o. Sarajevo. Traženo umanjeње znatno bi uticalo na cjelokupno poslovanje preduzeća, budući da se radi o dijelu poslovanja koje obavlja ovo preduzeće u okviru svih poslova iz segmenata zajedničke komunalne potrošnje. Takođe bitno je istaći da predloženo umanjeње umanjuje tekuće grantove i to za poslove zajedničke komunalne potrošnje.

SERDA u okviru svojih aktivnosti realizira projekte koji su usmjereni ka sektoru informacionih tehnologija.

SERDA učestvuje u projektu „Market Makers“ koji ima za cilj edukaciju iz oblasti IT tehnologije i preko 500 polaznika je završilo različite kurseve. Ovaj projekat realizira se sa ključnim partnerima HUB387 i BiT Alijansa. Projekt obuhvata i 5 različitih programa stažiranja i prekvalifikacije za zanimanja iz oblasti IT industrije od koji je preko 20 zaposleno u kompanijama koje su učestvovala u ovom projektu.

Na drugi ciklus se prijavilo 1.300 kandidata od kojih je 50 najuspješnijih odabrano za obuku. Specifičnost ovog ciklusa ogleda se u tome što svi kandidati koji uspješno prođu obuku budu zaposleni u nekoj od IT kompanija.

Bitno je naglasiti da će se kroz ovaj projekat inicirati izmjena nastavnog programa na određenim predmetima na Elektrotehničkom fakultetu u cilju ispunjavanja potreba tržišta rada vezano za IT sektor.

SERDA i Vlada Kantona Sarajevo su pokrenuli inicijativu za izradu strategije razvoja informaciono komunikacione tehnologije na čijoj će implementaciji raditi Elektrotehnički fakultet. IKT sektor zauzima značajno mjesto u privrednim kretanjima BiH i regiona, te je jedan od tri ključna sektora privrede, koji imaju ogroman potencijal za ulaganje.

Takođe, u okviru IT projekata SERDA implementiran je projekat „Informacioni sistem za putnike u Jadranskoj regiji - TISAR“. Projekat se bavi tematikom pružanja informacija o javnom prevozu i informacijama u multimodalnom prijevozu na tehničkom i institucionalnom nivou u Jadranskoj regiji.

SERDA je bila nosilac aktivnosti na izradi aplikacije na program Horizon 2020., INTEGRA i sličnim IT projektima.

### **AMANDMAN III**

Ministarstvo za obrazovanje, nauku i mlade, iza pozicije 614200 LAM001 096 Stipendije učenicima i studentima 100.000 KM dodaje se nova pozicija Stipendije studentima Odsjeka za automatiku i elektroniku, Odsjeka za elektroenergetiku i Odsjeka za telekomunikacije Elektrotehničkog fakulteta Univerziteta u Sarajevu i studentima Mašinskog fakulteta Univerziteta u Sarajevu 333.000 KM

Ministarstvo komunalne privrede i infrastrukture, pozicija WAO004 051 KJKP „Park“, Komunalni redari 450.000 KM smanjuje se za 225.000 KM.

Ministarstvo finansija, pozicija 614300 JAN001 041 „SERDA“ 400.000 KM smanjuje se za 108.000 KM.

**Obrazloženje:** Jedan od najvećih generatora razvoja i stvaranja radnih mjesta u narednih 20 godina će biti sektori energetske efikasnosti i telekomunikacija, te poslovi vezani za metalski sektor. Vlada je dijelom prepoznala ovaj potencijal, te u svom ekspozu navela metalski sektor kao jedno od prioritarnih područja gdje će pomoći razvoj. Najmanje što Vlada može učiniti je privući veći broj studenata koji ulaze u pomenute sektore značajnim smanjenjem broja samofinancirajućih studenata. Ovaj amandman predviđa pokrivanje troškova studija svim redovnim studentima pomenutih odsjeka na Elektrotehničkom fakultetu, te na Mašinskom fakultetu Univerziteta u Sarajevu. Iznos je zasnovan na broju od 185 studenata.

Transfer prema KJKP „Park“ po osnovu komunalnih redara se polovi kako bi se firma stimulisala da boljim radom, izdavanjem i naplatom kazni, te boljom unutrašnjom organizacijom firme ova pozicija nadomjesti do potrebnog iznosa.

Transfer Sarajevskoj razvojnoj agenciji se umanjuje kako bi se potaknula u putu ka samoodrživosti i kako bi se okrenula evropskim i regionalnim fondovima kao osnovnim izvorima svog finansiranja. Ova agencija je u partnerstvu sa 32 opštine i Kanton Sarajevo snosi nesrazmjerno učešće u radu agencije.

**Stav predlagača:** Amandman se ne prihvata.

### **O b r a z l o ž e n j e**

Sredstva na poziciji KJKP „RAD“ su planirana za isplatu plaća KJKP "RAD" d.o.o. Sarajevo. Traženo umanjeno znatno bi uticalo na cjelokupno poslovanje preduzeća, budući da se radi o dijelu poslovanja koje obavlja ovo preduzeće u okviru svih poslova iz segmenata zajedničke komunalne potrošnje. Takođe bitno je istaći da predloženo umanjeno umanjuje tekuće grantove i to za poslove zajedničke komunalne potrošnje.

Što se tiče sektora energetske efikasnosti i telekomunikacija, te poslova vezanih za metalski sektor u narednom periodu će se sugerisati agenciji SERDA da se u okviru njihovih aktivnosti uvrste projekti iz navedenih oblasti.

### **AMANDMAN IV**

Ministarstvo za obrazovanje, nauku i mlade, iza pozicije 821600 091 Rekonstrukcija i investiciono održavanje dodaje se nova pozicija Opremanje računarskih centara 150.000 KM.

Neprofitne organizacije i pomoć vjerskim zajednicama, briše se pozicija 615300 BDU001 085 Rekonstrukcija, adaptacija, sanacija i izgradnja vjerskih objekata 150.000 KM.

**Obrazloženje:** Pristup djece računarskim tehnologijama u osnovnom obrazovanju je prioritet za postavljanje zdravih temelja za budući razvoj kantona. Ovim amandmanom će se obezbijediti sredstva za 10 računarskih centara koji podrazumijevaju učionicu sa 20 umreženih računara uz prisustvo adekvatno obučenog obrazovnog osoblja. Računarski centri će se opremiti u školama koje pohađaju djeca kojima je iz materijalnih razloga otežan pristup računarskim tehnologijama. Odabir škola će izvršiti nadležno ministarstvo.

Kapitalni transfer vjerskim zajednicama se briše kako bi se vjerske zajednice potaknule na aktivnije prikupljanje donacija od pojedinaca i firmi, kao i unaprijeđeno upravljanje sredstvima prikupljenim sa raznih nivoa vlasti, a imajući u vidu i transfer vjerskim zajednicama od 350.000 KM predviđen u ovom prijedlogu budžeta.

**Stav predlagača:** Amandman se ne prihvata.

### **O b r a z l o ž e n j e**

Sve škole na području Kantona Sarajevo u okviru redovne nastave i realizacije nastavnog programa za predmet informatike imaju opremljene kabinete sa računarskom opremom, na koji način je svim učenicima omogućen pristup računarskoj opremi.

Pozicija 615300 BDU001 085 „Rekonstrukcija, adaptacija, sanacija i izgradnja vjerskih objekata“ je izvršena u iznosu od 84.000 KM.

### **AMANDMAN V**

Ministarstvo privrede, pod ekonomskim kodom 613000 dodaje se nova pozicija Poslovni centar Ministarstva privrede 20.000 KM.

Ministarstvo privrede, pozicija 614300 IAN025 047 Podrška sajmovima u organizaciji KJP „ZOI 84“ i KJP „Skenderija“ 85.000 KM smanjuje se za 20.000 KM.

**Obrazloženje:** Ne treba posebno obrazlagati da je glomazna administracija možda i najveća prepreka investiranju koje bi vodilo otvaranju radnih mjesta. Neke sredine u BiH su već daleko ispred Kantona Sarajeva u informisanju i pomoći potencijalnim investitorima. Uspostavljanje Poslovnog centra će pomoći na dva polja. Prvo, adekvatnom obukom i procedurama može se značajno pomoći firmama koje već posluju ili namjeravaju poslovati u kantonu. Drugo, Poslovni centar će biti generator upostave i implementacije pojednostavljenja procedura koje će biti rezultat saradnje sa međunarodnim institucijama. Dobar primjer je sporazum koji Kanton već ima sa Međunarodnom finansijskom korporacijom. Zaposlenici Poslovnog centra će biti isključivo već zaposleni u Ministarstvu, a inicijalna sredstva su potrebna za uspostavu centra, opremanje prostora i obuku zaposlenih.

Smanjenje pozicije podrške sajmovima je potrebno kako bi se KJP „Skenderija“ i „ZOI '84“ potaknuli da veći dio sredstava prikupe od privatnih komercijalnih partnera koji će vršiti promociju svojih proizvoda, usluga i djelatnosti na predviđenim sajmovima.

**Stav predlagača:** Amandman se ne prihvata.

### **O b r a z l o ž e n j e**

U Ministarstvu privrede Kantona Sarajevo već postoje sistematizovana radna mjesta “Stručni savjetnik za evropske integracije” i “Stručni saradnik za razvojne projekte”, čiji opis poslova radnog mjesta predviđa poslove i aktivnosti koji su predloženi kao djelatnost poslovnog centra čije se osnivanje predlaže, zbog čega bi došlo do podudaranja i preklapanja.

Sredstva planirana za potrebe Sajmova u organizaciji KJP „ZOI 84“ i KJP „Skenderija“ Sarajevo u cjelosti su izvršena sa 30.06.2015. godine.

**P R E M I J E R**

**Elmedin Konaković**

Dostaviti:

1. Predsjedavajući Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Evidencija
5. A r h i v a



web: <http://vlada.ks.gov.ba>  
e-mail: [vlada@vlada.ks.gov.ba](mailto:vlada@vlada.ks.gov.ba)  
Tel: + 387 (0) 33 562-068, 562-070  
Fax: + 387 (0) 33 562-211  
Sarajevo, Reisa Džemaludina Čauševića 1





